



Endurreisnaráætlun Fullveldissinna fyrir atvinnuvegina

#Stofna strax endurreisnarbanka ríkisins

sem jafnframt verður stofnlánasjóður atvinnuveganna og rekur kreppusjóð heimilanna. Veita strax nýju fé í atvinnuuppbyggingu. Bankarnir verða líklega allir hlutafélagabankar og enn er óvíst hvernig uppgjöri þrotabúa, eða málaferla, lýkur og eignarhald gæti orðið alla vega. Landið þarf til framtíðar einn ríkisbanka sem er um leið fjárfestingabanki fyrir atvinnulífið. Fjárskortur er nú þegar farinn að valda atvinnuhruni og þrotum fyrirtækja og heimila. Ríkissjóður og Seðlabanki geta veitt þessum banka eins mikið fjármagn og þarf, meðan gætt er að verðbólguáhrifum seðlaprentunar.

#Flýta opinberum framkvæmdum

við samgöngumannvirki og önnur opinber mannvirki. Að mestu innlendir kostnaður ef boðið er út í hlutum og ekki á EES-svæðinu og eykur því erlendar skuldir lítið en eykur eignir ríkis.

#Stofna fyrirtæki í orkufrekum iðnaði,

nýja áburðarverksmiðju, kísilgúrverksmiðju, efna-, milliefna- og léttmálmaverksmiðjur með stuðningi endurreisnarbanka. Fyrirtæki í eigu Íslendinga hafa ekki náð tókum á orkufrekum iðnaði og hafa þær verksmiðjur sem voru hér verið lagðar niður og mikið gjaldeyrstap hlotist af. Þessu þarf að snúa við og hefja aftur innlenda fjárfestingu í orkufrekum iðnaði.

#Flýta virkjunum

Hraða undirbúningi og framkvæmdum virkjana og orkufreks iðnaðar, flýta nýþróun s.s. djúpbörunarverkefninu en tryggja umhverfisvernd. Huga þarf að smærri virkjunum og stærri, þeim má flýta með ákvörðun ríkisstjórnar og Alþingis. Leita með virkum hætti að og semja við orkufrek iðnaðarfyrirtæki um nýfjárfestingar og efla þátttöku Íslendinga sjálfra í þeim, bæði ríkis, lífeyrissjóða, fyrirtækja og einstaklinga.

#Gefa strax út rúmar veiðiheimildir til strandveiðiflotans,

með auknum byggðakvóta og heimilda til frjálsra veiða smábáta. Viðskipti með veiðiheimildir í þorski skapa stétt leiguliða. Á síðasta fiskveiðiári leigðu handhafar veiðiheimilda út 36.000 tonn af þorski og 45.000 tonn af ýsu fyrir um 10.000 milljónir. Þessum veiðiheimildum, sem voru ekki nýttar af þeim sem fengu þær úthlutaðar, verði úthlutað að nýju og nýttar sem aukinn byggðarkvóti og til frjálsra veiða smábáta til hagsbóta fyrir sjávarbyggðirnar. Skilyrði er að afli verði unnin í sjávarbyggðunum og skapi þannig fleiri störf.

#Endurreisa strandsiglingar

og koma á hagkvæmum skipaflutningum umhverfis landið.

Mörg atvinnufyrirtæki á landsbyggðinni geta ekki flutt út vörur hagkvæmlega vegna flutningskostnaðar, vegaslit undan vöruflutningunum er mjög dýrt

#Efla og styrkja fjölbreytni í landbúnaði

og tryggja grundvöll hefðbundins landbúnaðar, efla heimaframleiðslu, alla ræktun, sérstaklega kornrækt, og efla rannsóknir á nýtingu jurta.

Staðið verði við þá samninga sem ríkið hefur gert við íslenska bændur og stutt verði við verkefnið „Beint frá býli” og útflutningsverkefni. Efla ferðapjónustu og nýbreytni í sveitaatvinnu. Áfram unnið að gæðastýrðum landbúnaði í sátt við íslenska náttúru.

#Hafna matvælatilskipun EES

og innflutningi á hráum dýraafurðum og niðurgreiddri undirmálsvöru.

Þessi tilskipun opnar landið fyrir undirmálsbúafurðum, niðurgreiddum af ESB, sem eykur smitsjúkdómahættu fyrir dýr og menn og færi illa með landbúnaðinn og yrði áhættusamt fyrir lýðheilsuna.

#Margfalda gróðurhúsaræktun,

lækka raforku-, varmaorku- og koltvísýringverð frá varmavirkjunum til gróðurhúsa.

Jarðvarmavirkjanir geta veitt gróðurhúsum í nágrenninu hagstætt verð á orku og koltvísýringi, hreinsuðum af brennisteinsvetni, það er þegar að hefjast hreinsun í Hellisheiðarvirkjun en hún framleiðir um 60.000 tonn á ári af koltvísýringi sem nægir mjög umfangsmiklum gróðurhúsaiðnaði

#Fjármagna menningarferðamennsku

og virkja söfn og menningarstofnanir til kynningar á menningararfinum.

Menningararfurinn er eitt helsta aðdráttarafið fyrir ferðamenn og fræðimenn og þarf að virkja það með samstilltu átaki og fjármagna kynningar og nýfjárfestingar

#Styrkja rekstrarumhverfi fyrirtækja

með stjórnkerfisaðgerðum, s.s með einföldun skatt- og kvaðakerfa.

Allan starfsemissramma fyrirtækjareksturs þarf að einfalda, skrifræðisbyrði ESB hefur borist hingað að talsverðu leyti með Evrópuréttinum vegna EES-samningsins og þyngist með ári hverju, verslun við lönd utan ESB er umgirt höftum sem þarf að afnema. Opinber innkaup og skattafslættir markaðs-, hönnunar- og þróunarstarfs eru verkfæri til þess.

#Endurreisa frjálsa samkeppni í verslun og viðskiptum

eftir fákeppni og alræði skuldsettra auðhringa.

Mikilvægt er að ríkið og ríkisbankarnir stuðli ekki að áframhaldi á þeirri fákeppni með því að halda lífi í stórfyrirtækjum sem hafa á undanförunum árum rutt fjölda smáfyrirtækja af vettvangi.

#Efla til muna aðhald og eftirlit

með samkeppni og heilbrigði í viðskiptum.

Við það verkefni verði einkanlega horft til þess að efla frjáls neytendasamtök og neytendavitund almennings.

#Undirbúa olíu- og gasvinnslu

og verja hagsmuni þjóðarinnar, þ.m.t. eignarhald og lögsögu til langrar framtíðar um vinnslu og úrvinnslu gass og olíu af hafsbotni, og fá bestu sérfræðinga í lið með stjórnvöldum.

Endurreisnaráætlun Fullveldissinna um stjórn landsins

#Endurreisa óskert vald Alþingis

Leita samninga um breytingar á EES-samningnum til þess að vilji og vald Alþingis ráði gildi tilskipana EES.

Gömlu flokkarnir á Alþingi hafa ekki hafnað neinni af tilskipunum ESB vegna EES-samningsins enda er ákvæði í samningnum sem segir að ESB geti sagt þeim hluta hans upp sem tilskipunina áhrærir. Valdi Alþingis hefur því verið takmörk sett síðustu 14 árin en forsenda fyrir endurreisn stjórnkerfisins er að fullt svigrúm verði til breytinga sem nauðsynlega þarf að gera á lögum í ljósi hrunsins

#Endurreisa stjórnskipanina

Undirbúa vandlega breytingar á stjórnarskránni til þess að auka vald kjósenda og tryggja fullveldi þjóðarinnar.

Auðvelda þjóðaratkvæðagreiðslur, auka vald kjósenda, koma inn einstaklingskjöri og einfalda framboð, lækka inntökuþröskuld til Alþingis, girða fyrir fullveldisafsal, skilgreina vald forsetans sem vörð stjórnarskrár sem er skyldugur að hafna lögum sem stangast á við hana.

#Endurreisa laga- og regluverk

í samræmi við þarfir Íslands og reynslu af hruninu.

Lagasmíð síðustu áratuga þarf gagngera endurskoðun í ljósi hruns fjármálageirans. Evrópurétturinn, með tilkomu gerða í gegnum EES, hefur breytt lögum og reglum hér og haft misjafnlega góð áhrif og sumt ekki í þágu landsmanna eða íslenskra hefða. Það kallar á heildarendurskoðun, m.a. á lögum og reglugerðum sem ESB hefur sett hér í krafti EES-samningsins.

#Endurreisa Seðlabanka

og taka yfirstjórn peningamála inn í efnahagsmálastjórn Stjórnarráðsins með nýjum lögum.

Seðlabankinn hefur í raun fengið það hlutverk að halda verðbólgu í skefjum með stýrivöxtum einum saman; það beið skipbrot. Peningamálastjórn, s.s. stýrivaxta-, bindiskyldu-, lausafjárhlutfalls- og gengisskráningarávarðanir, gjaldeyris-, viðskipti og útgáfu peninga, er ekki hægt að einangra frá öðrum hagstjórnartækjum, s.s. fjárlögum ríkisins, og þarf að vera samhæfð stjórn yfir öllu. Sjálfstæði seðlabanka er orðið að kreddu sem ríki, sem vilja hafa hagstjórn í lagi, fylgja ekki.

#Endurreisa íslensku krónuna

með styrkri og faglegri hagstjórn til þess að þjóna Íslandi til frambúðar, lækka stýrivexti og endurskoða verðtryggingu.

Uptaka evru er óhugsandi vegna allt annarra hagsveiflna hér en í ESB. Notkun þjóðargjaldmiðils er eina affarasæla leiðin til árangurs í íslenskri hagstjórn en öguð og fagleg peningamálastjórn samhæfð öðrum þáttum hagstjórnar er forsenda þess að gjaldmiðillinn nái einhverjum stöðugleika. Skýjaborgir um alþjóðagjaldmiðil og fjármálamiðstöð eru óraunhæfar á svo litlu gjaldmiðilssvæði. Lækka þarf

stýrivextina og halda þeim lágum, endurskoða þarf verðtryggingu, þ.m.t. grunn og reikniforsendur vísitölu til þess að mat raunverðmæta ráði.

#Endurreisa lagaramann um fjármálastarfsemina

ný lög um banka, eingarhaldsfélög, hlutabréfaviðskipti, verðbréfamarkað, endurreisn upprunalegs sparisjóðakerfis, endurskoða starfsemi lífeyrissjóðakerfisins.

Breyta þarf stefnu, laga- og regluramma og endurskoða ESB-regluverkið sem við höfum haft vegna EES og var ein ástæða hrunsins og krafna ESB um ríkisábyrgðir fyrir banka. Takmarka og endurskilgreina þarf starfsvið banka, endurskoða reglur um fjárfestingabanka, eignarhaldsfélög og eignayfirfærslur milli landa, lánastarfsemi, starfsemi erlendis, ríkisábyrgðir o.s.frv.

#Endurreisa lagaramma um fyrirtæki,

setja nýtt regluverk um almenningshlutafélög, eignarhald, eignamat, reikningskil, meðferð fjár og gagnsæi.

Almenningshlutafélög á markaði mega ekki vera leiksoppur örfárra braskara sem ná undirtökum til að auðgast. Endurskoða þarf hlutverk hluthafa og stjórna jafnhliða því að ábyrgð og valdsvið stjórnenda og gagnsæi fyrir almenning þarf að aukast.

#Endurreisa gjaldeyrisviðskipti og afnema gjaldeyrishöft

fyrir út- og innflutningsverslun en við teljum koma til greina að hafa áfram stjórn á öðrum fjáreignaflutningum til og frá landinu.

Venjuleg fyrirtæki í reikningsfærðum útflutnings- og innflutningsviðskiptum geta ekki búið við gjaldeyrishöft. Flutningur eigna inn eða út úr landinu hjá einstaklingum, eignarhalds- og fjármálafyrirtækjum þarf endurskoðaðar reglur.

#Endurreisa ríkisbúskapinn

og koma á fót ráðdeild og sparnaði í ríkisfjármálum.

takmarka útgjöld og forgangsraða verkefnum í þágu þjóðarheildarinnar

#Endurreisa siðvæðingu landsins eftir hrun

og efla rannsóknarnefnd um afbrot og nýta þann liðstyrk erlendra sérfræðinga sem nú býðst og leita bóta Bretastjórnar

vegna ófræginga, brots á trausti, grannþjóðasáttum og 1. gr. EES-samningsins , áður en skuldabréfasamþykktir vegna Icesave koma til.

Endurreisa hagsmunagæslu í utanríkismálum

sem byggð verði á fríverslun og samstarfi við sem flestar þjóðir og þátttöku í Norðurlandasamstarfi, EFTA, OECD, SP, WTO og NATO án stuðnings við eða þátttöku í hernaðaraðgerðum.

Mun styrkari hagsmunagæslu þarf á alþjóðavettvangi og eflingu samstarfs við vinþjóðir, alþjóðastofnanir og fríverslunarsamtök.

Endurreisnaráætlun Fullveldissinna fyrir heimilin

#Stofna strax Kreppulánasjóð

sem grípur inn í hjá þeim hluta heimila og smáfyrirtækja sem eru ofhlaðin skuldum. Þannig má koma í veg fyrir að fólk sé borið út af heimilum sínum eða svipt lífsviðurværi.

Fyrirmyndina að Kreppulánasjóði má sækja til Kreppunnar miklu 1930 en þá leysti sjóður með þessu nafni til sín eignir fjölmargra bænda. Í framhaldinu fengu ábúendur jarðanna leigu- og forkaupsrétt. Sömu aðferð má nota í dag gagnvart of skuldsettum húseigendum. Starf sem þetta krefst mikillar vinnu en þar skiptir miklu að stórir hópar fagfólks á þessu sviði eru nú atvinnulausir. Lausn sem miðar að því að hver og einn sem aðstoðar er þurfi leggi inn umsókn er margfalt ódýrari en almennar niðurfærslur skulda sem eru auk þess óréttlátar og óframkvæmanlegar. Úrlausn Kreppulánasjóðs á einkanlega við hjá aðilum sem komnir eru í greiðsluþrot en eiga samt einhverjar eignir á móti skuldum. Kreppulánasjóður getur þannig yfirtekið skuldir þó svo að heildarupphæð þeirra sé allt að 50% hærri en markaðsverð enda bæði gengi krónu og markaðsvirði eigna í sögulegu lágmarki.

#Endurreisa á fjárhag heimila

sem enn búa við jákvæða eiginfjárstöðu. Það er best unnið með lengingu lána, tímabundinni frýstingu erlendra lána og frestun fullnustuaðgerða þar sem hægt er að sýna fram á greiðslugetu til lengri tíma. Mikilvægt er við núverandi aðstæður að milda eins og hægt er innheimtuferli og fullnustuaðgerðir sem ganga á rétt einstaklings og öryggi fjölskyldunnar. Með tímabundinni ríkiseign bankakerfisins geta stjórnvöld leikið hér lykilhlutverk.

#Reisn einstaklinga og fjölskyldu

er mikilvægur þáttur í því endurreisnarferli sem framundan er. Því verður ekki afstýrt að einhverjar fjölskyldur missi núverandi íverustaði og allmargir eintaklingar lendi í gjaldþrotameðferð. Stjórnámálamenn sem lofa því að engir þurfi að ganga þá braut eru ekki trúverðugir.

L-listi fullveldissinna fagnar því að Alþingi hafi nú afgreitt ný lög um gjaldþrot og greiðsluáðlögun.

#Samhjálp, heilbrigði og öryggi almennings

eru lykilþættir í velferðarsamfélagi okkar á krepputíma og aldrei mikilvægara að félagsþjónusta sveitarfélaga geti mætt bágum aðstæðum tekjulágra, atvinnulausra og allra sem eiga erfitt með að mæta útgjöldum til brýnustu lífsnauðsynja.

Þá leggur L-listi fullveldissinna til að þegar verði gripið til ráðstafana til að tryggja atvinnulausum, tekjulágum og þeirra fjölskyldum ókeypis lækniþjónustu og lyf á lágmarksverði.

#Ókeypis skólamáltíðir og fríar tannlækningar barna

eru brýnni baráttumál nú en nokkru sinni.

Tryggja má fæðuöryggi og heilbrigði barna og ungmenna með ókeypis skólamáltíðum. Reynsla annarra þjóða sem gengið hafa í gegnum djúpar efnahagslægðir undirstrikar mikilvægi þessa. Þá er tannheilsu þjóðarinnar hætta búin vegna þess fáránlega misræmis sem er í þátttöku ríkis í heilbrigðiskostnaði. L-listi fullveldissinna gerir skýlausa kröfu um að tannlæknakostnaður 18 ára og yngri verði allur greiddur af ríkinu.

Endurreisnaráætlun Fullveldissinna vegna fullveldisins

#Fullveldissinnar hafna ESB umsókn

og telja að krafan um atkvæðagreiðslu um aðild ógni á mjög alvarlegan hátt fullveldi þjóðarinnar og lýðræði.

Reynsla Evrópuþjóða af lýðræði ESB er að þar fær almenningur að kjósa ítrekað um sömu hugmyndir þar til krafa ESB hefur verið samþykkt. Eftir það er ekki efnt til kosninga og mikil vafamál að þjóðir geti hrint af sér því helsti sem ESB leggur á frelsi og fullveldi sinna aðildarríkja.

#Fullveldissinnar verja fullveldisákvæði Stjórnarskrárinnar

og telja að meðan þau eru í gildi sé óeðlilegt að íslensk stjórnvöld hefji undirbúning, viðræður eða umsóknarferli sem gengur gegn Stjórnarskránni. Krafa okkar er að áður en til slíkra samninga komi verði efnt til þjóðaratkvæðagreiðslu um afnám fullveldisákvæða Stjórnarskrár og þau aðeins felld úr gildi ef 2/3 hlutar þjóðarinnar greiða því atkvæði.

Enginn ágreiningur er um það meðal aðildarsinna og þeirra sem andvígir eru aðild að ESB að breyta þarf Stjórnarskrá lýðveldisins til þess að aðild verði að veruleika. Fullveldissinnar telja það vanvirðu við lýðveldið ef þingmenn sem eiðsvarnir eru hollustu við Stjórnarskrána vinna gegn megin ákvæðum hennar. Þá telja fullveldissinnar að afsal fullveldis sé ákvörðun sem ekki verði tekin af naumum meirihluta enda er þar verið að kasta á glæ baráttu margra kynslóða og sú ákvörðun leggur helsti og byrðar erlends valds á komandi kynslóðir.

#Fullveldissinnar vara við marklausum forkosningum

um ESB mál þar sem lagt væri fyrir þjóðina að heimila stjórnvöldum að hefja ESB-viðræður líkt og ákveðið var á landsfundi Sjálfstæðisflokks. Fullveldissinnar telja að hér sé vísvitandi beitt falshugtökum þar sem ekki er hægt að hefja ESB-viðræður nema stjórnvöld samþykki fyrst að þau vilji og stefni að ESB aðild. ESB-kosning fer því fram með Alþingiskosningum og lykilatriði er að tryggja að ESB-sinnar nái ekki meirihluta á Alþingi. Þá má benda á að fyrrnefndar forkosningar geta veikt samningsumboð íslenskrar sendinefndar og eru því dæmi um ófyrirgefanlegan hráskinnaleik með fullveldi og fjöregg lýðveldisins.

#Fullveldissinnar telja tvíhliða samning betri en EES

samninginn og telja að íslensk stjórnvöld eigi að leggja mat á það hvort og þá hvenær sé hægt að koma að endurskoðun á öllu samstarfi Íslands við Evrópu án þess að hagsmunum landsins sé teflt í hættu.

Fullveldissinnar benda á að sú staða sem ESB stendur nú frammi fyrir og lýsir sér í áformum um að fjölga ekki aðildarríkjum að svo stöddu geti jafnframt falið í sér mikil tækifæri fyrir Ísland og íslenska hagsmuni. Fullveldissinnar telja engu að síður að í þessum efnum verði að stíga varlega til jarðar því allar breytingar á samstarfi Íslands og Evrópulandanna verði að vinna með það að leiðarljósi að útflutningshagsmunir landsins skerðist á engan hátt.